

Wat is die verskil tussen die Christelike geloof en alle ander godsdienste? Ons hoor so dikwels dat mense van mening is dat alle gelowe eintlik maar dieselfde is. Hoekom is Christene dan so onversetlik, deur te glo dat hulle geloof die enigste 'regte' geloof is? "Hoe kan jy so bekrompe, so dweperig en so onverdraagsaam wees deur te glo dat Jesus die enigste weg na God is?"

Die Nuwe Verdraagsaamheid

In ons dekadente en immorele samelewing is die belangrikste deug deesdae verdraagsaamheid. Die grootste gebrek is onverdraagsaamheid. Wat die wêreld egter vandag onder 'verdraagsaam' verstaan, is baie ver verwyder van die eintlik betekenis van die woord. Verdraagsaamheid het deesdae 'n baie wyer betekenis as in die verlede; nou word van ons verwag om ook misleiding en onsedelikheid te aanvaar.

Die Nuwe Era-toleransie (New Age tolerance) val skynbaar vas wanneer dit met Bybelse Christelikheid gekonfronteer word. Enige Christen wat dit sou durf waag om by basiese Bybelse beginsels te staan, word van onverdraagsaamheid beskuldig!

Dit lyk ietwat skynheilig: diegene wat alle gelowe as gelyk verklaar, is dan juis die mense wat soveel tyd en aandag daaraan spandeer om die Christelike geloof verkeerd te bewys. Juis hulle is ooglopend baie onverdraagsaam teenoor Bybelse lering...

Kontraste En Weersprekings

Ons moet egter aan diegene wat glo dat alle gelowe op dieselfde beginsels gebaseer is, die volgende uitwys: Bahaïsme het die Nuwe Era-gees in 'n godsdienst verander, sodat dit alle ander gelowe insluit. Hulle maak daarop aanspraak dat alle gelowe dieselfde is en dat hulle sowel Jesus Christus, as Boeddha, Lao-Tzu, Confucius, Mohammed, Zoroaster, en 'n hele swetterjoel ander ghoeroes, 'profete' en 'heiliges' navolg. Islam is egter sterk monoteïsties. Hulle is baie gesteld daarop dat daar net een God is. Hindoeïsme, daarenteen, is politeïsties en erken ten minste 330 miljoen gode.

Hoe kan monoteïsme en politeïsme dan dieselfde wees? Boeddhisme is panteïsties en leer dat alles god is. Confucius erken geen god nie. Hoe kan Ateïsme dieselfde wees as Panteïsme en Politeïsme en Monoteïsme? Dit kan mos nie!

Lewe Vs Nirwana

Jesus Christus het gesê dat Hy gekom het sodat ons lewe in oorfloed kan hê (Joh. 10:10). Hindoeïsme en Boeddhisme leer egter dat die lewe een groot boosheid is. Volgens hierdie gelowe behoort ons almal op soek te wees na die einde van ons persoonlike lewe deur 'Nirwana'. Soos 'n druppel water wat in die grote oseaan val en alle karakter verloor, net so behoort ons, deur opeenvolgende reïnkarnasies en meditasie, die staking van persoonlike bewustheid na te streef.

Omdat Boeddhisme en Hindoeïsme die lewe as ellendig beskou (dit is nogal 'n selfvullende profesie, want die heidendom maak die lewe maar ellendig), is hulle doelwit die vernietiging daarvan. Hoe kan Christus se lering oor Geestelike Lewe, die Ewige Lewe en Oorfloedige Lewe, dieselfde wees as 'Nirwana'?

Onversoerbare Etiek

Daar is ook die hele kwessie van etiek. Die meeste gelowe hang poligamie aan - dat 'n man verskeie vrouens mag hê. Die Christendom het nog altyd monogamie voorgestaan: een man wat lewenslank met een vrou getroud is. Christus het egskeiding veroordeel. Mohammed het egter voorsiening gemaak vir maklike en vinnige verbale egskeidings. Dié twee sienings is tog sekerlik onversoerbaar.

Gemeenskap Met Die Bose

Die Apostel Paulus het geskryf: *“Wat probeer ek sê? Bedoel ek dat afgodsoffers iets belangriks is of dat afgode werklik bestaan? Hoegenaamd nie. Wat ek egter wel sê, is dat daardie offers in werklikheid aan duiwels gebring word en nie aan 'n godheid nie. En ek wil nie hê dat enigeen van julle met die duiwels gemeenskap het nie.”* 1 Kor. 10:20.

Die Bybel is baie duidelik - God is nie met alle godsdienstige aktiwiteite tevrede en gelukkig nie. Die mees veroordeelde sonde in die Bybel is afgodsdien. Die meeste wêreldse godsdienste is deurspek met afgodsdien. *“Alhoewel hulle daarop aanspraak maak dat hulle danig slim is, het hulle in werklikheid heeltemal in dwaasheid verval - in so 'n mate dat hulle die verering van die altydlewende God met afgode vervang het wat sterflike mense en voëls en diere en slange uitbeeld.”*
Rom. 1:22.

Is Jy 'n Goeie Mens?

Volgens die meeste gelowe is die mens inherent goed. Die Bybel, daarenteen, beskryf die mens is inherent boos. *“Dit is soos die Skrif sê: 'Niemand is goed nie - selfs nie een enkele een nie. Daar is nie een wat werklik verstandig is nie; niemand wat werklik ernstig na God soek nie... Ons het immers almal gesondig. Ons almal het God beroof van die eer wat Hom toekom.”*
Rom. 3:10-23.

Pasop Vir Godsdienstige Misleiding

Jesus het ons teen valse profete (Mat. 7:15), vals leraars en godsdienstige leiers (Mat. 23) gewaarsku. *“Wees versigtig dat niemand julle op 'n dwaalspoor bring nie.”* Mat. 24:4.

In Openbaring staan daar dat God aan die einde 'n Engel sal stuur wat die satan sal bind *“...sod at hy nie langer die nasies sou verlei nie...”*

Openb. 20:3. Dit is baie duidelik dat satan deesdae baie nasies verlei. Ons is in 'n geweldige konflik betrokke - 'n oorlog van wêreldbeskouings:

- Ateïsme vs. Teïsme
- Politeïsme vs. Monoteïsme
- Kommunisme vs. Christendom
- Sharia wet vs. God se Wet
- Poligamie vs. Monogamie
- Slawerny vs. Vryheid
- Aborsie vs. Pro-lewe
- Pornografie vs. Moraliteit

- Homoseksualiteit vs. Familiewaardes
- Siektes vs. Gesondheid
- Leuens vs. Waarheid
- Verontreiniging vs. Reinheid
- Dood vs. Lewe
-

Godsdiens is hoe die mens na God probeer uitreik. Christus is egter God wat Hom na die mens neerbuig. Godsdiens is mensgemaak. Christendom is God-geïnisieer. Godsdiens sê: Probeer! Christus sê: Vertrou!

Ons, as Protestantse gelowiges, glo in die vryheid van gewete, spraak, omgang en aanbidding. Die Protestantse Hervorming het beslag gegee aan die konsep van godsdienstige verdraagsaamheid. Die feit dat ons die beoefening van ander godsdienste verdra, is egter geen aanduiding dat dit reg of aanvaarbaar is nie. Die moderne Nuwe Era-konsep van “verdraagsaamheid” is beslis nie die oorspronklik betekenis van die woord nie.

Wat Is Die Verskil?

Wat is die verskil tussen die Christen-God en die gode van ander godsdienste? Die allerbelangrikste is dat die God van die Bybel wêrklik is. Die ander gode nie. God bestaan. Die ander is verbeeldingsversinsels en demoniese misleiding. Die verskil tussen die Christendom en alle ander godsdienste is die rede waarom ons verskillend kyk na mense, dinge, die werklikheid en verantwoordelikheid, verlossing en dissipelskap.

Dit is ook meer as net die waarheid oor God, die mens, die ewigheid en verlossing. Dit is selfs meer as die lewe, hier en ook in die hiernamaals. Die allerbelangrikste en grootste verskil tussen die Christendom en alle ander gelowe, is ons begrip van God se Heiligheid en die erns van sonde.

Versoenende Werk Van Jesus

Wat absoluut uniek is aan die Christendom, is die sentrale boodskap van die eenmalige en onherhaalbare, vervangende Versoeningswerk van Jesus. Jesus Christus is die Lam van God wat die sonde van die wêreld wegneem. Sy opofferende dood aan die Kruis het versoening vir ons sonde bewerkstellig en die verlossing van Sy kinders moontlik gemaak.

Ander gelowe het 'n baie laer dunk van God se Heiligheid en die erns van die mens se sonde. Net die Christendom beskik oor die balans tussen God se Heiligheid en Sy genadige liefde. Die beslissende vraag is egter: hoe kan 'n Heilige God homself met sondige en verdorwe mense versoen, en nog steeds Sy geregtigheid behou? Slegs iemand wat sonder sonde was, kon die versoener wees en net God Sêlf, in die gestalte van 'n mens, kon die volmaakte offer wees.

Die Lewe Van Christus

Ander godsdienste is gebaseer op die lêring van die stigters daarvan. Die Christendom is egter gebaseer op die lêwe van die Stigter. Christus is sentraal in die Apostoliese Geloofsbelydenis:

“Ons Here, Jesus Christus, gebore uit die Maagd Maria, wat gely het onder Pontius Pilatus, gekruisig is, gesterf het en begrawe is; wat ter helle neergedaal het en op die derde dag weer opgestaan het uit die dood. Wat opgevaar het na die Hemel en sit aan die Regterhand van God, die Vader, die Almagtige; vanwaar Hy sal kom om te oordeel die wat nog lewe en die wat reeds gesterf het.”

Herdenk Christus

Dit is waarom die volgende die feeste van die Christelike Geloof is: Kersfees, Goeie Vrydag, Paasfees en Hemelvaartdag. Kersfees herdenk die menswording van God, Emmanuel, God met ons; Goeie Vrydag - die soendood van die Seun van God vir die sonde van die wêreld; Paasfees - Christus se oorwinning oor die dood, die hel en die graf deur Sy Opstanding. *“Ek was dood en kyk, nou leef Ek vir altyd en Ek het die sleutels van die dood en die doderyk.”*
Openb. 1:18

Bo Alle Gesag

Hemelvaart verkondig die Heerskappy van Christus oor alle menslike gesag en instellings. *“Christus het die Hemel binnegegaan. Hy sit nou aan die regterhand van God, met die engele, magte en kragte onder Sy beheer.”*

1 Pet. 3:22.

“God het volle mag oor die Hemel aan My toevertrou. Gaan dan, maak dissipels... Leer hulle om alles te gehoorsaam wat Ek aan julle opgedra het.” Mat. 28:18-20.

“Want Christus moet aan bewind bly totdat Hy alle vyande finaal verslaan en aan Hom onderdanig gemaak het.” 1 Kor. 15:25.

“Ons het dan nou ’n groot Hoëpriester wat deur die Hemele beweeg het, Jesus die Seun van God. Laat ons voortdurend aan ons geloofsbelydenis aangaande hierdie Jesus vashou.” Heb. 4:14.

“Daarom het God Hom ook tot in die hoogste posisie verhoog en aan Hom die Naam gegee wat belangriker is as elke ander naam. So sal by die noem van Jesus se heerlike Naam elke knie in die Hemel en op die aarde en onder die aarde buig, en elke tong sal erken: ‘Jesus Christus is Here!’ En so sal God die Vader verheerlik word!” Fil. 2:9-11.

Christus Se Uniekheid

Jesus Christus het nie net aanspraak daarop gemaak om die pad te ken nie, Hy ís die pad. Hy het nie net die waarheid geleer nie, Hy ís die Waarheid. Hy het nie net lewe nie, Hy ís die Lewe!

Net Jesus Christus het ’n perfekte lewe geleef, ’n versoenende dood gesterf en het weer uit die dood opgestaan. Confucius, Boeddha, Mohammed en al die ander is dood, begrawe en daar is net nooit weer van hulle gehoor nie. Die Opstanding van Jesus Christus uit die dood is egter ’n unieke, historiese feit.

Die Lewensredder

Die mensdom is besig om in 'n sonde-oseaan te verswelg. Die wêreldgodsdienste is besig om 'swemhandleidings' uit te deel en probeer om die drenkelinge te leer swem.

Jesus Christus is egter die Lewensredder wat Self in die oseaan ingedui het om die wat besig was om te vergaan, te red - ten koste van Sy eie lewe.

"Daar is geen redding by iemand anders nie. Daar is geen ander naam op aarde wat mense kan aanroep om gered te word nie." Hand. 4:12. Is Jesus Christus jou Heer en Verlosser?

Of sal Hy jou ewige Regter wees? Die vraag is nie: sal jy voor Hom buig nie, maar wánneer sal jy voor Hom buig?

"Daarom het God Hom ook tot in die hoogste posisie verhoog en aan Hom die Naam gegee wat belangriker is as elke ander naam. So sal by die noem van Jesus se heerlike Naam elke knie in die Hemel en op die aarde en onder die aarde buig, en elke tong sal erken: 'Jesus Christus is Here!' En so sal God die Vader verheerlik word!" Fil. 2:9-11. Die eerste keer het Hy gekom as Lam wat die sonde van die wêreld wegneem.

Die tweede keer, wanneer Hy weer kom, kom Hy nie as Redder nie, maar as Regter, Koning van die konings en Heer van die here, 'n oorwinnaar en ewige Regter. Ons buig vandag, terwyl dit nog genadetyd is, voor Hom, of ons sal eendag op die Oordeelsdag voor Hom moet buig - sonder 'n keuse. Die Genadedeur sal dan dig gesluit wees en alle hoop en vergifnis sal tot niet wees.

Ons buig of nóú voor Hom wat ons Heer en Meester is, of op die Oordeelsdag, wanneer Hy sit as die ewige Regter wat gaan oordeel.

Is Jesus jou Redder of jou Regter?